

**III. OUTRAS DISPOSICIÓNS****AXENCIA DE PROTECCIÓN DA LEGALIDADE URBANÍSTICA**

*RESOLUCIÓN do 6 de maio de 2026 pola que se ordena a publicación do convenio de adhesión do Concello de Cortegada.*

O día 5 de maio de 2026, a Axencia de Protección da Legalidade Urbanística e o Concello de Cortegada asinaron o anexo ao convenio de adhesión polo que se amplían as competencias delegadas na Axencia.

De conformidade co establecido no artigo 10 da Lei 2/2016, do 10 de febreiro, do solo de Galicia, dispoño a súa publicación no *Diario Oficial de Galicia*.

Santiago de Compostela, 6 de maio de 2026

María Victoria Núñez López  
Directora da Axencia de Protección da Legalidade Urbanística

**Anexo ao convenio de adhesión entre o Concello de Cortegada e a Axencia de Protección da Legalidade Urbanística**

O Concello de Cortegada delegou as súas competencias na Axencia de Protección da Legalidade Urbanística (en diante, APLU), mediante o convenio de adhesión do 5 de novembro de 2009, publicado no DOG o día 16 de novembro de 2009.

Porén, os cambios normativos acaecidos, especialmente a nova Lei 2/2016, do 10 de febreiro, do solo de Galicia, e a Lei 9/2013, do 19 de decembro, do emprendemento e da competitividade económica de Galicia, instauraron en Galicia o réxime de comunicacións previas e licenzas como títulos habilitantes, fronte á tradicional intervención administrativa exclusivamente mediante a licenza como control previo de calquera actuación con contido urbanístico.

Ante esta nova regulación, propónse unha modificación dos convenios orixinais co obxectivo de prestar un maior e mellor servizo aos concellos que veñen demandando a asunción por parte da APLU da disciplina urbanística en relación coas obras e usos suxeitos a comunicación previa e a resolución dos recursos administrativos por parte desta Axencia.



Asemade, o presente anexo ao convenio inclúe un novo réxime de financiamento, e modifícase a transferencia prevista inicialmente.

Segundo o Acordo plenario do 17 de abril de 2026, acordouse modificar o convenio de adhesión segundo o reflectido no presente anexo e pola Resolución da conselleira de Vivenda e Planificación de Infraestruturas, do 27 de novembro de 2025, delegouse a sinatura na persoa titular da Dirección da APLU.

### ANEXO I

Primeiro. Modifícase a estipulación segunda, Delegación de competencias, nos seguintes termos:

A. Engadese o parágrafo primeiro bis, co seguinte teor literal:

«1.bis. Comunicacions previas. As competencias recollidas no parágrafo anterior amplíanse a obras e usos do solo que se executen sen comunicación previa ou sen axustarse ás súas condicións.

No caso de infraccións relativas a obras e usos suxeitos a comunicación previa, serán tramitados unicamente os referidos a denuncias remitidas polos concellos adheridos, que deberán achegar un informe técnico municipal.

Nesta ampliación de competencias non están incluídas a inspección, a reposición da legalidade nin a potestade sancionadora en relación coas obras completamente rematadas antes da publicación desta modificación, que serán exercidas polo Concello».

B. Modifícase o parágrafo terceiro.

«3. A resolución dos recursos administrativos interpostos contra os actos ditados pola Axencia, en exercicio de competencias delegadas, corresponderalle igualmente á Axencia, despois do informe previo do Concello, que deberá emitirse no prazo máximo dun mes. Transcorrido este, continuarase coa tramitación do recurso».

Segundo. Modifícase a estipulación terceira, Réxime económico, segundo o seguinte:

«1. O réxime económico do presente convenio establécese coas seguintes condicións:

a) O Concello terá dereito ao 10 % do produto das multas coercitivas e sancións e, como máximo, trinta mil euros anuais, efectivamente recadadas pola Axencia no termo municipal de Cortegada tanto no exercicio das competencias propias como delegadas.



2. O importe das multas coercitivas e das sancións impostas pola Axencia, no exercicio das competencias delegadas polo Concello será ingresado polos suxeitos obrigados directamente na conta xeral da Axencia. No suposto de que non sexan aboadas no período voluntario, a Axencia solicitará da Consellería de Facenda o seu cobramento pola vía de constrinximento.

Ao finalizar cada exercicio anual, a Axencia transferirá ao Concello unha cantidade equivalente ao 10% dos ingresos percibidos e, como máximo, trinta mil euros anuais, polas multas coercitivas e sancións recadadas no seu termo municipal.

Este modelo de financiamento será de aplicación ás multas coercitivas e sancións impostas a partir da entrada en vigor do convenio, sen afectar as multas e sancións impostas en períodos anteriores, aínda que se recaden unha vez que entre en vigor o Convenio».

Terceiro. No tocante á estipulación cuarta, Obrigacións asumidas polo Concello, modifícanse as obrigas recollidas nas letras c) e f), nos seguintes termos:

«c) Cando o Concello remita denuncias por obras e usos do solo sen título habilitante ou sen axustarse ás súas condicións, deberá remitir un informe técnico con contido suficiente para a incoación dos expedientes administrativos que procedan. En todo caso, e como mínimo, deberán identificarse as persoas responsables da actuación inspeccionada, as obras obxecto do expediente, así como os incumprimentos da normativa urbanística.

f) Emitir informe previo á resolución dos recursos administrativos interpostos contra actos ditados pola Axencia no exercicio das competencias delegadas, no prazo máximo dun mes. Transcorrido este, continuarase coa tramitación do recurso».

Cuarto. Engádese a cláusula oitava no relativo á protección de datos, co seguinte teor literal:

«Oitava. *Protección de datos de carácter persoal*

As partes asinantes obríganse ao cumprimento do Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento xeral de protección de datos), da Lei orgánica 3/2018, do 5 de decembro, de protección de datos persoais e garantía dos



dereitos dixitais, e demais normativa vixente de aplicación en cada momento en materia de protección de datos.

A sinatura do presente convenio suporá o consentimento expreso das partes asinantes para incluír e facer públicos os datos persoais que consten no convenio, e o resto de especificacións contidas nel, de conformidade co artigo 15 da Lei 1/2016, do 18 de xaneiro, de transparencia e bo goberno (DOG núm. 30, do 15 de febreiro) e o Decreto 126/2006, do 20 de xullo, polo que se regula o rexistro de convenios da Xunta de Galicia (DOG núm. 149, do 3 de agosto)».

Quinto. *Prazo de vixencia do anexo*

Esta modificación entrará en vigor o día seguinte ao da súa publicación no *Diario Oficial de Galicia* e o seu prazo de vixencia será indefinido.

E para que así conste, asinan o presente anexo, por duplicado exemplar, no lugar e na data arriba indicados.

Polo Concello de Cortegada, Avelino Luis de Francisco Martínez, alcalde.

Pola Xunta de Galicia, a conselleira de Vivenda e Planificación de Infraestruturas.

P.D. A directora da APLU (pola Resolución do 27 de novembro de 2025) María Victoria Núñez López.

